

四

明

叢

書

張

鐸



楊文懿公文集卷第二十

明鄭楊守陳鏡川撰

桂坊稿

策題

問自古帝王必有訓典以貽天下後世至於我朝在太祖高皇帝則有大誥三編在太宗文皇帝則有爲善陰陽孝順事實宣宗章皇帝則有五倫書皆萬世之大訓也比者英宗睿皇帝命儒臣編輯大明一統志載萬國之幅員兼百代之文獻遐邇鉅細翕然可指廢興善

惡炳然可鑑雖曰儒臣所輯而宸衷綽旨親定其綱聖藻天書雄冠于首其可與前四書同垂于萬世歟竊嘗伏觀其略自兩京暨十三布政司皆首圖而次志圖則郡縣綦布志則山川風俗人物名宦之屬綱舉目張明如也夫談今者必證古舉遺者必先近圖之與志兩京與十三布政司之制在古亦有之乎山川以下在布政司者固博乎難以議爲也其在南畿者諸生素所見聞可舉其尤歟且羲卦禹疇異代之書也尙相表裏況我朝列聖之訓典豈無相表裏者乎堯言萬世如見周禮

聖人所從諸生其敬對無忽

問書契既作載籍浸繁六經其至者也孔子於六經但刪定贊修耳何謂之作七十子於此六藝或但可言詩或僅聞四代禮樂性道不得聞春秋莫能贊誰謂其通後世諸儒有各專一經而註之擬之續之補之者有兼五經而爲要義爲鈎玄爲徵旨爲正義者有總六經而爲法言爲外傳爲奧論者於是經明且久矣孰謂暴秦焚經而經存諸儒窮經而經亡乎諸儒論六經或謂其浩渺難曉或謂可不治而明或謂其皆心學或謂皆我

之注腳一何矛盾至此哉先哲用六經者有以其文倡諸儒有以其術佐人主有以其道繼絕學士將安所從歟如前所陳者請悉數其人而備論其實寧詳毋略也問百官惟將相權任至重歷代官制沿革與其人之賢愚道之得失可得而悉陳歟我朝削將相之權而分任於五府六部前古未有也然任必有所統權必有所寄名亡而實存矣相貴八統四的將貴五材六術今豈異古乎請備論以規之

問余讀易至於豐之繇未嘗不歎聖人之爲世慮深且

至也夫世之所憂者屯耳否耳蹇耳剝耳幸而豐焉世
所樂也而聖人乃謂其可憂援日月之中昃盈食以爲
喻必欲王者尙大而照天下斯可無虞其爲世慮何其
深且至耶今天下承平百年犁鋤尋於遐徼雞犬囂於
窮閭達官貴人牆屋被文繡而婢僕厭粱肉民物可謂
豐矣自禁衛至于邊防隸尺籍者如雨內外之閑廩圉
牧成雲兵馬可謂豐矣文昇鱗倅壅於銓曹武弁日繁
廩弗能給皆患無術以汰之人材可謂豐矣普天率土
凡百稱是雖兩漢唐宋之盛弗能踰也然民物豐矣而

一有水旱則窮者流亡富者乏匱兵馬豐矣而一有征伐則精卒勁騎俱不給於營陣人材豐矣而庶官之員恆闕緩急輒有乏材之歎其故何也豐之可憂者其爲此耶非耶抑又有大於此者耶天下之可憂者其詳有幾憂而圖之計將安出凡天下之事與其貽悔於後孰若預憂於前先數者預憂而爲之計則可以保豐於悠久否則能無悔乎今聖天子臨御正如日中之照天下有司欲秉炬以佐其光也故咨於諸生范文正公有言士當先天下之憂而憂後天下之樂而樂諸生豈無憂

天下如文正者乎其悉心以告

問人心不同有如其面行治所由異也古之人若堯桀
凱凶較然霄壤天下萬世所知矣若夫聖之清和伯主
之正譎大夫之濫隘士之拯溺受牛與贖人辭金拒鄰
之贅與嫗不逮門之女孔孟有定論矣他若相之或通
或介將之或寬或嚴司刑之或恕或刻以至立教之或
以柔勝或以剛克守郡者或以術破奸黨或以禮和寇
讎治邑者或戴星而勞或彈琴而逸典選者或嗔而與
人官或笑而不與人官治兵者或不戮一人或鞭七人

貫三人耳至於同仕宦也有苦身自約有放意自恣同
奏事也有力爭有順旨同侍講也有爲元老而恭有起
布衣而莊同爲直指使也有多誅殺有多縱舍同使秦
也有專美本朝有微說國弊同致師也有右入壘有左
射以敢同在軍見君使也有納不納者矣同除喪鼓琴
也有和不和者矣同鋤地見金也有擲不擲者矣若此
者孰優孰劣疇是疇非九原可作其誰與歸夫論別人
物者大學格致之一端也毋徒諉諸不暇

應天府鄉試錄序

自古御天下者必需賢才而理賢才猶珠玉也非人求之不自致是故鄉賓興郡國勸駕有司懸科代相踵矣應天府我國家肇都于此今爲南京而鄰府暨州十有七皆畿也夫京畿首善而鍾材昔周漢之東其故都弊矣然鎬京之士萬民所望長安英俊之域絃冕所興詩人賦客尙侈談之況南京雅際熙洽仍擅眾大凡百無異車駕臨日聖化恆先王氣恆萃故方聞偉秀魁壘之士雲出林立比今襲天下解額視諸藩獨盛每科必命侍臣往蒞典禮冠侯服焉今上紀成化之七年府尹臣

亨府丞臣哲以考試官請上命洗馬臣守陳侍講臣瓊皆不敢辭遂冒炎暑犯晨夜凌風濤而南至則同考官監丞臣禹錫教授臣玘臣俊教諭臣子臯臣厚訓導臣祥臣旋臣寬監試官御史臣燮臣昭與百執事具在遂入棘闈胥戒飭曰命鄉論秀爲國與天下也任重且難莫有尙之凡與此者必皆精白厥心勤慎乃事求無負茲任哉其或怠私是療官也是蔽賢也是負國也弗視于面衷其安乎不畏于人神其昧乎於是合六館諸司十八府州之士凡二千三百有奇試之三遵解額取百

三十五人乃第其名拔其文之尤併鈔梓爲錄蓋古者
賢能之書行年之書猶茲錄也錄一成而士之進退異
焉故已錄者或以欣而未錄者或以戚然君子所性雖
大行不加窮居不損是區區者安足計哉且陟臺一級
非努力莫造其顛黍稷之華人惟冀其實故已錄者一
有位焉官必盡職諫必盡言相必盡道相與奉明主尙
三代之隆奄九圍四裔而膏雨之保豐持泰於億萬年
則竹帛鐘鼎名昭于無窮錄安足貴也否則玷斯錄矣
且驥雖一蹶何累千里戰或三北竟收大勳故未錄者

必益修眾德彌燭奧理發之文皆粹乎無瑕傳乎有味
燁乎騰光追儷古之作者則雖在遐僻必有能錄之況
畿內也夫錄者豈直爲已錄者之興哉尤爲未錄者之
楷也臣故兩勛之謹書于錄之首以獻於上曰連城照
乘之珍至矣請天府登之

送通守李君廷美序

量之器自龠合豆區至于斗斛釜鍾鉅細殊而受粟之
寡多隨焉細而受多則盈鉅而受寡則歉平之者慨也
穀粟之肆糴者曰歉糴者曰盈紛然而交爭有立其旁

者不待乎概一舉目而已識其盈歉矣然或盈或歉始雖紛爭終必底于平而後已士之用世也其材德厚薄猶量之有鉅細而其職位崇庳亦猶粟之有寡多也第用者或未能底于平識者或未若旁立者耳聞李君廷美以進士擢刑部主事陟員外郎其性行和以良其文辭敏以蔚其用刑公以仁蓋鉅量也余官京師於刑曹善五子曰何廷秀彭鳳儀張時敏三時雍與廷美皆士之後邁而不羣者廷秀鳳儀皆陟憲副時敏陟憲僉而時雍陟郡守矣廷美比擢廣郡守未行以事遷倅於衡

郡余謂五子雖有不齊而爲鉅量則鈞廷美之郡守且
猶歉而況倅乎然世之盈者多至於覆而歉者率底于
平焉知歉之不爲廷美福也抑士之材德學則進否則
退又非若量之一定而不可易者廷美仕不懈於學況
遭聖明之世他日所受可量乎哉余亦旁立者也識廷
美審矣故說量以敘別

新化縣學記

新化之邑創自宋熙寧中學隨以建紹聖閒邑治遷今
所學亦遷于其西元季燬國初復之至景泰改元又燬

以其地之隘也徙築邑治西南逮今纔廿餘禩已敝而將傾都憲吳公琛興壁撫洩茲邑慨焉顧僉憲邵侯琮叔璋曰學敝若茲在所必葺然小邑寡民不可斂以病之費將安出時候治獄獄有賄當入官者僅二百金請以充費公喜曰可遂命寶慶守謝君省經之邑之父老羣告于君曰今學之地有突有窪故室宇或爽厥宜而章縫弗利於武病之久矣邑治東垣之外有廟祀城隍尤敝當葺而其地羨餘弘廣且方若矩也平若掌也可以立學請徙而易之君以告于吳公于邵侯皆曰善乃

命府知事周田營之自成化辛卯春正月肇作大成殿暨兩廡重門庖庫以俎豆聖賢作明倫堂洎講齋寢舍膳宮米廩以居食師生端其述道崇其門垣以是歲夏六月告成僉謂新學不可無述而謝君之從子鐸官翰林因爲之請余聞之化民成俗必由於學大學之道在新其德以及其民耳新其德則身修新民之德則家齊國治天下平古之所謂學所謂教所謂化一皆此而已矣宋人之創是邑而命之名也其謂造新邑以敷新化耶抑謂邑新而化隨以新耶然其時新法病民新經誤